

禹貢錐指卷第六

德清胡渭學

淮海惟揚州

傳曰北據淮南距海渭按海岸雖自東北迤西南而
經云東漸于海則青徐揚之海皆主東言可知也傳
於青兼言北既為失之而於揚專言南則失之愈甚
通典曰揚州北距淮東南距海舊曰南距海今改為
東南自晉以後歷代史皆云五嶺之南至于海並是
揚州之地案禹貢物產貢賦職方山藪川浸皆不及
五嶺之外且荊州南境至衡山之陽若五嶺之南在
九州封域則以鄰接宜屬荊州豈有捨荆而屬揚此
近史之誤也杜氏此言良是改南為東南視傳為優

其所距者即秦漢南海郡之揭陽縣唐潮陽郡今潮州府是也南海郡治番禺其極東界為揭陽縣王莽改縣曰南海亭蓋至此始為南海而揭陽以北猶為東海故知揚州之海經亦主東言也

黃文叔云揚州吳越之域地盡南海皆揚土也杜佑分嶺南為古南越以為非禹貢九州之域何所據依哉禹貢冀北界標碣石而著島夷則地窮沙漠凡今雲朔燕薊諸夷居於山者皆是也揚南界表海而著島夷則地窮漲海凡甌閩交廣諸夷居於山者皆是也是蓋聲教所暨聞盛德而皆徠臣為唐虞之盛安有四海之內而非禹貢九州之域

老澤按說文島海中有山可依止也雲朔燕薊甌
閩交廣之地皆不在海中安得謂之島夷且雲朔
燕薊社氏已列在冀域甌閩亦列在揚域獨交廣
為南越耳交廣南距海謂海內皆九州之域可也
若北海西海不知所極匈奴為北海內地西域三
十六國皆西海內地豈亦在九州之域者哉此不
足深辨唯裴駰史記集解於略定揚越下引張晏
曰揚州之南越顏師古漢書敘例張晏字子博中山人次張揖蘇林之後如淳孟康之前皆三國魏人而
晉太康地志云交州本屬揚州取交趾以為名虞
之南極也二說相承已久習非不悟今駁正如左
古有百越之稱一在禹貢揚州之域史記秦始皇

本紀一十五年王翦悉定荆江南地降百越之君

置會稽郡東越列傳秦并天下廢閩越王無諸及

越東海王搖以其地為閩中郡是也一即南越又

名揚越在五嶺之南揚荆梁三州之徼外秦始皇

本紀三十三年發諸嘗逋亡人贅壻賈人略取陸

梁地索隱曰嶺南之人多處山陸其性強梁故曰陸梁為桂林象郡南海以適讀

謫遣戍是也漢復立無諸為閩越王王閩中故地

都冶徐廣曰今儋官又立搖為東海王都東甌徐廣曰今永寧此皆句

踐之後在揚域地理志以會稽為吳分者是也漢會稽郡

有治縣師古曰本閩越地戰國策蔡澤云吳起為楚南收揚越史記

吳起列傳楚悼王時相楚南平百越南越列傳云

秦已并天下略定揚越置桂林南海象郡又云漢

立尉佗為南越王使和集百越太史公自序云漢

既平中國而佗能集揚越以保南藩賈誼過秦論

云南取百粵與越同之地以為桂林象郡鼂錯上書

云揚粵之地少陰多陽秦之戍卒不能其水土嚴

安上書云秦使尉佗屠睢將樓船之士南攻百越

此百越即揚越秦時號陸梁地地理志以蒼梧鬱

林合浦交趾九真南海日南為粵分者是也漢分秦三郡地

為七郡屬交州揚越猶於越閩越駱越之類字義古無可考

安見為揚州之南越邪自張晏倡為此說而顏師

古張守節皆從之師古曰本揚州之分故云揚越

皇人佳有...

三

漱六軒

守節曰夏禹九州本屬揚州故云揚越學者翕然宗之至杜佑作通典始於九州之外別列南越且云嶺南鄰接荊州不當捨荆而屬揚今按兩廣輿圖唯南雄韶州廣州惠州四府地在古揚州之徼外而自肇慶以西至潯州縣地千餘里皆在古荊州之徼外南寧以西至安南則又在古梁州之徼外矣禹分九州揚地不當斗入西南數千里據後漢獻帝紀建安十八年復禹貢九州注云省交州以并荊州益州則南越縱在九州之域亦當分繫荆梁張晏魏人乃不諳故事而以南越專屬揚州

又誤中之誤

據揚雄交州箴曰自開闢不羈不絆周公攝詐白雉是獻則自周以前南越未嘗通中國况有其地乎

太康地志雖有交州本屬揚州之說然沈約蕭子
顯撰宋齊州郡志並不言交廣爲禹貢某州之域
至唐人修晉書始據太康地志於交廣二州直書
曰禹貢揚州之域隋書同而其說遂牢不可破然神功
元年狄仁傑上疏以爲北橫大漠南阻五嶺天所
以限戎狄而隔中外是亦不從晉書至杜氏於九
州之外別列南越頗協經義而世猶不信愚請以
一事折之舜以青州越海分齊爲營今五嶺橫絕
南北曷不分揚之南境自爲一州冀州南北太廣
分衛爲并燕以北爲幽今揚南之廣大不啻如冀
北曷不分後世交廣之地增置二州而乃止於十

有二乎近史之誤明甚它如南交之宅交趾之撫
蒼梧之崩韶石之奏傳記清訛貽惑後人尤不可
以無辨詳見朔南暨下

殷割淮南江北之地以益徐故爾雅云江南曰揚
州蓋視夏之揚爲小然其西又得禹貢荊州之地
何以知之按導水文漢至大別入江而爾雅云漢
南曰荊州蓋漢水之名至大別山而止其曰漢南
者謂大別以西漢水之南也曰江南者謂大別以
東江水之南也荆揚之界當於此分然則殷揚州
之境縮於北而贏於西與夏之揚廣狹適相當矣
周禮東南曰揚州其數澤川浸不殊於禹貢特未

知與殷制異同如何耳

揚州有古汪芒氏之封春秋時可考者蓼六越楚

東境是吳蔣弦黃舒宗巢舒庸舒鳩英桐鍾離濮左傳昭元年吳

濮有繁杜注云吳在東濮在南今建寧郡南有濮夷凡十七國戰國時初屬越後楚

滅越而有其地秦并天下置九江鄣郡會稽閩中

南海東境今潮陽郡是漢復置揚州領郡七後漢魏晉竝因之

晉領郡國二十二唐為淮南道之廣陵揚州淮陰楚鍾離濠壽

春壽永陽滁歷陽和廬江廬同安舒新春蕪弋陽光

等郡江南東道之丹陽潤晉陵常吳郡蘇吳興湖

餘杭杭新定睦新安歙會稽越餘姚明臨海台縉雲

處永嘉溫東陽婺信安衢建安建長樂福清源泉漳

浦漳臨汀汀潮陽潮等郡江南西道之豫章洪鄱陽

饒潯陽江臨川撫廬陵吉宜春袁南康虔等郡按以上

通典所列無可更定者以今輿地言之浙江江西

福建皆是江南則江寧揚州廬州安慶池州太平

寧國徽州鎮江常州蘇州松江十二府滁和廣德

三州其鳳陽府則鳳陽臨淮定遠壽州霍丘盱眙

天長淮安府則山陽鹽城河南則汝寧府之光州

光山固始湖廣則黃州府之羅田蘄水蘄州廣濟

黃梅廣東則潮州府皆古揚州域也

淮水自今河南汝寧府自息縣南東流經光山縣北

是為揚域又東經光州北又東經固始縣北又東

北經江南鳳陽府潁州北又東經霍丘縣北潁上
縣南又東經壽州北與豫分界又東北經五河縣
東南又東經泗州南盱眙縣北又東北經淮安府
清河縣南又東經山陽縣北又東經安東縣南而
東北注于海與徐分界

海自山陽縣東北折而東南歷鹽城興化如臯縣
東又南至通州東爲江水入海之口其南岸則太
倉州也自州東又東南歷上海縣金山衛東又南
歷浙江鎮海象山縣折而西歷寧海縣東又西南
歷黃巖太平樂清瑞安平陽縣東又南歷福建福
寧州東又西南歷羅源連江長樂福清縣東又西

南歷莆田惠安同安縣南又西南歷海澄漳浦詔
安縣東南又西歷廣東澄海縣南又西至潮陽縣
南揚州之海於斯極矣昔周宣王命名公平淮夷
帥師自江漢循流而下故其詩曰江漢浮浮武夫
滔滔又曰于疆于理至于南海淮夷者淮南之夷
南海即揚東南所距之海韓退之南海神廟碑云
廣州治東南海道八十里扶胥之口黃木之灣此
番禺之海也潮州刺史謝上表云州南近界漲海
連天此揭陽之海也詩所謂至于南海者亦至揭
陽而止耳豈必踰嶺以至番禺哉左傳僖四年楚
子使屈完言於齊侯曰君處北海寡人處南海注

云楚界猶未至南海因齊處北海遂稱所近蓋夸
大之辭其襄十三年子囊述共王之德曰撫有蠻
夷奄征南海征與處不同蓋楚至悼王時吳起為
楚南收揚越楚地始踰嶺而瀕南海共王則征之
而已此却非夸大之辭

揚之南界經無可見據通典以潮陽隸古揚州蓋
自江西大庾嶺東南羣山縣亘以達於廣東潮州
府之揭陽即揚之南界也大庾嶺在南安府大庾

縣南八十里縣本漢豫章郡南壆縣地南接廣東南雄府保昌縣界

縣亦南壆縣地水經注以為五嶺之最東亦名東嶠漢書謂

之塞上南越相呂嘉破漢將軍韓千秋于石門送

漢節至乎嶺上即此地也後漢志名臺領山唐以
後又稱梅嶺其西為聶都山贛水所出與湖廣郴
州宜章縣接界裴淵廣州記曰五嶺大庾始安臨
賀桂陽揭陽也此與水經注小異桂陽即騎田而
無都龐有揭陽顏師古云嶺者西自衡山之南東
窮於海一山之限耳而別標名則有五蓋依裴氏
五嶺訖揭陽揭陽山一名揭嶺在今揭陽縣西北
百五十里南北二支直抵惠州府興寧海豐二縣
界山南揭陽故城漢縣也今西自越城騎田萌渚
陂陁相屬直趨大庾嶺又循脊而下東包揭陽屬
之海埂與江西福建分險唐一行所謂南戒山河

至衡陽東循嶺徼達東甌閩中以限蠻夷者是也
星傳謂南戒為越門

揚之西界經亦無可見今據通典所隸郡縣約略
言之蓋自河南光山縣與豫分界其南為湖廣之

羅田蘄水蘄州廣濟

舊謂九江在黃州黃梅界故光山以下並屬荆今以洞庭為九江當屬揚也踰

江而南則為江西之瑞昌又西南為武寧寧州萬
載萍鄉永新永寧又東南為龍泉崇義大庾皆與

荆分界處也

彭蠡既豬陽鳥攸居

釋文蠡音禮涓按攸漢書作適後同

傳曰彭蠡澤名隨陽之鳥鴻鴈之屬冬月所居於此

澤正義曰日之行也夏至漸南冬至漸北鴻鴈九月

而南正月而北左思蜀都賦所云來落南翔水澤北
徂是也此鳥南北與日進退隨陽之鳥故稱陽鳥林
氏曰攸居者水退其地可居也蔡氏曰陽鳥謂鴈也
今惟彭蠡洲渚之間千百為羣吳氏曰彭蠡澤跨豫
章鄱陽之境廣數百里受歙信饒撫之水及洪東境
之水豬者名鄱陽湖流出名揚瀾在蠡虔吉素筠之
水及洪西境之水皆會過南康至湖口縣入江渭接
地理志豫章彭澤縣西有彭蠡澤今江西湖口彭澤
都昌三縣皆漢彭澤縣地湖口彭澤屬九江府都昌
屬南康府呂覽云禹為彭蠡之障乾東土謂斯役也
彭蠡澤後稱彭蠡湖在今江西南昌府城東北一

百五十里饒州府城西四十里南康府城東五里
九江府城東南九十里周迴四百五十里浸四郡
之境亦曰鄱陽湖以中有鄱陽山而名俗因號在
都昌者為東鄱湖在南昌者為西鄱湖湖又隨地
而異名其在星子縣東南接南昌界者曰宮亭湖
水經注云廬山南嶺下有神廟號曰宮亭廟故彭
湖亦有宮亭之稱湖中有落星石周迴百餘步高
五丈其在都昌縣西南者曰揚瀾湖又北曰左里
湖通典云地在章江之左因名元和志云揚瀾湖
北曰左里一作左蠡今縣西南九十里有左里城
是也其在餘干縣西北者曰擔石湖通典云鄱陽